



**AN COIMISINÉIR TEANGA  
LE CEAPADH MAR  
CHOIMISINÉIR UM FHORBAIRT NA MEÁN**

D'fhógair an tAire Turasóireachta, Cultúir, Ealaíon, Gaeltachta, Spóirt agus Meán, Catherine Martin TD inniu go mbeadh an Coimisinéir Teanga, Rónán Ó Domhnaill, le ceapadh mar Choimisinéir um Fhorbairt na Meán leis an rialálaí nua, Coimisiún na Meán.

D'fháiltigh Rónán Ó Domhnaill roimh fhógra an Aire Catherine Martin agus labhair sé ar thábhacht Oifig an Choimisinéara Teanga:

*“Onóir cheart chríochnaithe a bhí ann nuair a rinne Uachtarán na hÉireann, Micheál D Ó hUigín, mé a cheapadh mar Choimisinéir Teanga ar an 12 Márta 2014. Beidh buíochas go deo agam ar an tacaíocht a thugann Oireachtas Éireann do m’Oifig i gcónaí.*

*Tá bród as cuimse orm as an dúthracht mhór a chaith foireann m’Oifige le cearta teanga a chur chun cinn i measc an phobail ar bhonn leanúnach. Cuideoidh forálacha Acht na dTeangacha Oifigiúla (Leasú), 2021 le daingniú a dhéanamh ar chultúr agus cleachtas na gceart teanga san earnáil phoiblí.*

*Is beart tairbheach é go bhfuil Coiste Comhairleach bunaithe ag an Rialtas chun Plean do Sholáthar Seirbhísí Stáit trí Ghaeilge a ullmhú: is cinnte go mbeidh obair an Choiste cinniúnach chun an sprioc 20% d’earcáithe nua sa tSeirbhís Phoiblí a bhfuil inniúlacht sa Ghaeilge acu a bhaint amach faoi 2030. Ardtosaíocht phráinneach náisiúnta atá ann, dar liom.*

*Gabhaim buíochas ó chroí le foireann Oifig an Choimisinéara Teanga as a ndíograis ghairmiúil agus a gcuid saineolais. Fáiltím go mór roimh an deis leas earnáil na meán a chur chun cinn leis an rialálaí nua, Coimisiún na Meán, agus táim ag súil go mór le bheith ag obair le Cathaoirleach Feidhmiúcháin agus an bheirt Choimisinéirí eile ar Choimisiún na Meán.”*

I measc thorthaí oibre Oifig an Choimisinéara Teanga ó 2014 i leith, tá:

- Próiseas leasaithe monatóireachta chun faireachán bliantúil a dhéanamh ar dhualgais reachtúla teanga.

- Imscrúduithe mórshuntasacha i gcroí-réimsí teanga amhail craoladh na Gaeilge ar RTÉ; polasaí na Roinne Oideachais maidir le soláthar oideachais lán-Ghaeilge; dualgas na n-údarás áitiúil maidir le gnóthaí pleanála sa Ghaeltacht;
- Tuarascálacha chuig Thithe an Oireachtais maidir le h-inniúlacht Ghaeilge chomhaltaí den Gharda Síochána sa Ghaeltacht agus an córas Eircode.
- Treoirí nua maidir le fógraíocht ag comhlachtaí poiblí;
- Tráchtairacht chuimsitheach ar chur i bhfeidhm Scéimeanna Teanga agus Acht na dTeangacha Oifigiú
- Scoirfidh Rónán Ó Domhnaill de bheith ina Choimisinéir Teanga nuair a rachaidh sé i mbun a chuid cúraimí nua i lár mhí Feabhra.

[CRÍOCH]

### NÓTAÍ EAGARTHÓIREACHTA

Ceaptar an Coimisinéir Teanga i seilbh oifige go ceann téarma 6 bliana.

Arna moladh ag Dáil Éireann agus ag Seanad Éireann, rinne an tUachtarán Mícheál D Ó hUigín Rónán Ó Domhnaill a cheapadh mar Choimisinéir Teanga ar an 12 Márta 2014 agus a athcheapadh mar Choimisinéir Teanga ar an 2 Márta 2020.

Beidh freagracht fhoriomlán ar an gCoimisinéir um Fhorbairt na Meán as gnóthaí forbartha agus maoinithe na hearnála meán trí chéile agus as moltaí áirithe i dTuarascáil an Choimisiúin um Thodhchaí na Meán a chur i bhfeidhm. I measc na moltaí úd, tá:

- Comhionannas, Éagsúlacht agus Ionchuimsitheacht a chur chun cinn in earnáil na meán;
- Athbhreithniú cuimsitheach ar sholáthar seirbhísí Gaeilge in earnáil na meán trí chéile;
- Scéimeanna tacaíochta nua a chur ar fáil d'earnáil na meán trí chéile

Is é an Coimisinéir um Fhorbairt na Meán a dhéanfaidh stiúradh ar thionscnaimh oideachais agus oiliúna maidir le feidhmeanna an Choimisiúin, i gcomhar le comhpháirtneirí ábhartha in earnálacha an oideachais agus na meán.

### FIOSRUITHE MEÁN

Páidí Ó Lionáird. Bainisteoir Cumarsáide. 087 9092101/091 504006